

佛說法句經



佛說法句經

①	諸菩薩融心覺序品	-----	3
②	不壞諸法菩薩說宿緣品	-----	4
③	觀聲性空證實際品	-----	6
④	觀三處空得菩提品	-----	7
⑤	親近真善知識品	-----	12
⑥	二十一種譬喻善知識品	-----	13
⑦	寶明聽眾等悲不自勝品	-----	16
⑧	普光莊嚴菩薩等證信品	-----	17

⑨	煩惱即菩提品	20
⑩	求善知識不惜內外壽命嫌疑品	21
⑪	普光問如來慈偈答品	22
⑫	即為寶明授記品	25
⑬	傳持品	25
⑭	護經如眼寧喪身命不怠品	27

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛說法句經

① 諸菩薩融心覺序品

聞如是：一時，婆伽婆在日月宮中勝藏殿上。

與大菩薩摩訶薩十萬人俱。其名曰：勝積菩薩、普賢菩薩、文殊師利菩薩、金剛藏菩薩、金剛幢菩薩、金剛慧菩薩、觀世音菩薩、決定慧菩薩、彌勒菩薩、三世辯菩薩、常住願菩薩、勢力自在菩薩、無起作菩薩、常慈菩薩、常視

一相光菩薩。如是等菩薩摩訶薩十萬人俱。

復有菩薩摩訶薩，名曰寶明，與無量比丘、比丘尼、優婆塞、優婆夷百千萬人。

復有無量天、龍、夜叉、護法善神，及餘他方無數菩薩，皆悉集會。

② 不壞諸法菩薩說宿緣品

於是，眾中有菩薩，名不壞諸法寶明，承佛神力，前白佛言：世尊！我於往昔，燃燈佛所，出家學道。彼時，名字等賢比丘。爾時，世尊即授於我今菩薩記號，曰不壞諸法。

爾時，寶明菩薩白佛言：世尊云何授我號為寶明乎？惟願，世尊！說此寶明名字所以？

佛言：諦聽！諦聽！善思念之！

今為天眾，求天乘者，說斯決定大乘微妙要法，及汝名字金剛語句。

爾時，天眾奉教如聽。

佛告寶明菩薩：善男子！汝且觀此諸佛名字，為是有耶？為是無耶？為有實耶？為無實耶？

善男子！若名字是有，說食與人，應得無飽。若得無飽，一切飲食，則無所用。

何以故？說食尋飽，不須食故。

若名字無者，定光如來不授我記及汝名字。如無授者，我不應得佛。

善男子！當知字句，其以久如。以其如故，修題諸法名字性空，不在有無。

善男子！若名字空者，於諸毀訾、誹謗、譏呵，及以讚譽，不應瞋喜。

何以故？誹謗、毀訾，及以讚譽，二俱空故。

③ 觀聲性空證實際品

善男子！若遇如上境界，應作是念：「此音聲者，為大為小？青黃赤白，從何方來？今來罵我，著我何處？形相何似？」

上下諦觀，都無所得。若無所得，不應生於瞋喜之心。

作是觀已，堅持不捨，當知不久得阿耨多羅三藐三菩提。

何以故？觀音聲性空，證於如故。

譬如有人，夜想飛空。及其睡時，見身飛行。菩薩摩訶薩亦復如是。觀聲性空，必得空證。

乃知音聲，但誑耳根，而無實體。

④ 觀三處空得菩提品

善男子！菩薩摩訶薩，欲得阿耨多羅三藐三菩提者，當觀三處：內、外、中間，是為三處。於三處中，無有實法，即為解脫。解脫者，即菩提也。

寶明菩薩白佛言：世尊！三處觀者，為何謂也？

佛告寶明：善男子！欲知三處，當修身觀。

眼即為內，色即為外，心處中間，是為三處。

或有眾生，從無始已來，不知三事虛之與實，妄起種種煩惱倒惑。是以我今教如實觀，令斷諸惑。

善男子！眼不自見，色不自名，心無形質，三事俱無。是故，眼不自見，常

處於內。色不自名，常處於外。心無形相，處無所在。

善男子！眼不自見，屬諸因緣。緣非見相，眼即是空。色屬眼時，名色為色。若眼性空，色亦無實。

何以故？從空眼見，體無實故。

善男子！菩薩摩訶薩，知眼是空，於內無染。知色是空，於外無著。識心是空，滅於諸行。耳鼻舌身意，亦復如是。

善男子！知眼屬緣，見無自性，眼終日見，猶為無見。色性屬眼，而不自名，名終日名，猶為無名。

善男子！以斯空眼，常看空色，內外遍觀，心不可得。常求諸色，而不可得。耳聲，鼻香，舌味，身觸，意法，亦復如是。

善男子！應作是念：「若眼與色，非為空者。眼住於內，不應辯外。色住於外，不應從眼。眼是有住，色亦有住，心是無為，不應在有。」

何以故？有之與無，性相違故。

是故，當知眼色與心，虛通無礙。

善男子！意即為內，法即為外，心處中間。意不自知，法不自名，心無形相，三事俱無。是故，意不自知，常處於內。法不自名，常處於外。心無形相，實無處所。意不自知，屬諸因緣。緣非知相，意即是空。法屬意時，名法為法。若意性空，法亦無實。

何以故？從空意知，體無性故。

善男子！知意是空，於內無染。知法是空，於外無著。知心是空，滅於諸

行。知意屬緣，知無自性，意終日知，猶為無知。法性屬意，而不自名，名終日名，猶為無名。以斯空意，常知空法。內外遍觀，心不可得。

是故，菩薩應作是念：「若意與法，非為空者。意住於內，不應辯外。法住於外，不應從意。意是有住，法亦有住，心是無為，不應在有。」

何以故？有之與無，性相違故。

是故，當知意法與心，虛通無礙。譬如陽炎，遠視似水。

無智之人，為渴所逼，急走向之。轉近轉滅。炎邊住者，知此地中，本來無水。見彼走人，知其妄相，便生嗤笑。語走人言：「此中無水，但陽氣耳，誑汝眼根。」彼人聞已，熱渴心息。

色亦如是，凡夫無智，謂呼有實。為欲渴所逼，生貪求相，熾然起心，趣向

奔走。

色相屬緣，轉觀轉滅。證實相者，知此陰中，本來無色，本來無識。見凡夫人，貪色疾走，知其妄想，便生嗤笑。為說實法，語眾人言：「陰中無陰，心中無心，念中無念，但緣氣耳，誑汝眼根。」

若有智者，聞已，妄渴心息。陰界諸入，亦復如是。

善男子！譬如凡夫，夜夢見身種種光明，食百味食。復見遠行，至他方所，得好衣馬，侍從百方。欸爾起暝，尋命事力殺數千人。及其覺時，身光尋滅，亦不遠行。光明色相，空無所有。夢中行者，及與事力相殺之者，都無色相。

色亦如是，一切眾生，從無始已來，黑闇崖下，無明被底，長夜睡眠，處於夢宅，妄見諸色，起一切法。若男若女，生死涅槃，相殺相害，無有窮已。一

切眾生，謂呼為實。得道覺者，乃知虛妄。始知生死，同涅槃相。男女諸色，本性體空。

善男子！若色如是。一切諸法亦復如然。如空谷響，如芭蕉堅，如水中月，如空中花，如石女兒，如電久住，如水龜毛，如走兔角，究竟無實。

諸有智者，應除諸見。如世生盲，莫分別色。若不分別，當知不久得阿耨多羅三藐三菩提道。

善男女！一切眾生，為諸煩惱，弊於慧目。無眼生眼想，以斯忘想，見外境界，名之為色，如起貪著。以貪著故，流轉三有，如旋火輪，無有休也。

⑤ 親近真善知識品

善男子！一切眾生欲得阿耨多羅三藐三菩提者。當親近善知識，請問法要，

必聞如斯甚深要句。

爾時，寶明菩薩白佛言：世尊！云何是善知識？

佛言：善知識者，善解深法，空、無相、無作，無生無滅。了達諸法，從本已來，究竟平等。無業無報，無因無果，性相如如，住於實際。於畢竟空中，熾然建立，是名善知識。

⑥ 二十一種譬喻善知識品

善男子！

善知識者，是汝父母，養育汝等菩提身故。

善知識者，是汝眼目，示導汝等菩提路故。

善知識者，是汝腳足，荷負汝等離生死故。

善知識者，是汝梯凳，扶侍汝等至彼岸故。

善知識者，是汝飲食，能使汝等增長法身故。

善知識者，是汝寶依，覆蓋汝等功德身故。

善知識者，是汝橋梁，運載汝等度有海故。

善知識者，是汝財寶，救攝汝等，離貧苦故。

善知識者，是汝日月，照曜汝等，離黑闇故。

善知識者，是汝身命，護惜汝等，無有時故。

善知識者，是汝鎧仗，降伏諸魔，得無畏故。

善知識者，是汝縲繩，挽拔汝等，離地獄故。

善知識者，是汝妙藥，療治汝等煩惱病故。

善知識者，是汝利刀，割斷汝等諸愛網故。

善知識者，是汝時雨，潤漬汝等菩提身故。

善知識者，是汝明燈，能破汝等五蓋闇故。

善知識者，是汝善標，教示汝等趣正道故。

善知識者，是汝薪火，成熟汝等涅槃食故。

善知識者，是汝弓箭，射殺汝等煩惱賊故。

善知識者，是汝勇將，能破汝等生死軍故。

善知識者，是汝如來，破汝煩惱至涅槃故。

善男子！善知識者，有如是無量功德。是故，我今教汝親近。

⑦ 寶明聽眾等悲不自勝品

於是，寶明與諸天眾，聞佛說此妙法，及善知識甚深要法。舉聲號哭，淚下如雨。悲啼懊惱，不能自裁。

自念：「我身從曠劫已來，為善知識之所守護。是故，今日值於如來，得聞深法。如是遇者，善知識力，非我力能。」

自念：「我等從本已來，未曾報恩，方便親近。」

說是語已。重復舉聲，悲號懊惱，槌胸大哭。譬如有人，新喪父母，號悼啼泣，死而復甦。

爾時，世尊見是事已，生憐愍心，即噓長歎。

以歎息故，振動三千大千世界。一切佛刹，皆亦大動。

⑧ 普光莊嚴菩薩等證信品

於是，東方，百千萬億阿僧祇土，有國名寶土，佛名寶相。有菩薩，名普光莊嚴。見此地動，白寶相佛言：世尊！如此地動，是何瑞也？

彼佛答言：西方，去此百千萬億阿僧祇土，有國名娑婆，佛號釋迦牟尼。為諸眾生，說於佛法，決定大乘報善知識恩，故現斯瑞。

普光莊嚴菩薩白寶相佛言：世尊！我欲與此大眾俱，至於彼娑婆世界釋迦牟尼佛所，請問彼佛：「事善知識，并問深法。」

寶相佛言：善男子！今正是時，宜速疾往。

於是，普光莊嚴菩薩，與無量大菩薩，各皆現身，坐寶蓮花師子之座，放大光明，如大力士，屈申臂頃，來至娑婆世界，在虛空中，湛然而住。

爾時，寶明菩薩見此光相，即白佛言：世尊！此何光相，初未曾見？

佛告大眾及寶明菩薩言：此是寶相如來所，諸大菩薩聞「我為汝說大乘經及善知識，現地動相。」是以來到。

寶明菩薩及諸大眾，聞是語已。皆大歡喜，整理衣服，待佛左右。

於是，普光莊嚴菩薩於虛空中，雨眾寶花。雨花已訖，尋至釋迦牟尼佛所，遶無數匝，合掌作禮，於一面立。

佛告普光莊嚴菩薩言：善男子！汝發來時，汝之世尊，氣力安否？汝涉遠來得無勞也？

普光莊嚴菩薩前禮佛足，答言：時，我世尊，常命色力，更無他也。慇懃囑者，致問無量。

於是，眾中文殊師利菩薩，謂普光莊嚴菩薩言：諸善男子！汝等遠來，何所諮請？

普光莊嚴菩薩白文殊師利言：大德！我承世尊說甚深法及善知識所有功德，是故我來，欲有諮請事：「善知識所有功德」。

文殊師利言：若有諮者，宜速發問。此諸大眾，願樂欲聞。

於是，普光莊嚴菩薩知大眾意，前禮佛足，白佛言：世尊！我等昔來，慧力微弱，不能善解「決定大乘深妙之義，及善知識所有恩德。」如佛前說：「恩重難議。」惟願，世尊！為諸大眾，說於親近善知識法。

佛言：善哉！善哉！善男子！乃能為諸眾生，問如斯法。諦聽！諦聽！善思念之！當為汝說。

⑨ 煩惱即菩提品

善男子！善知識者，有大功德，能令汝等，於貪欲、瞋恚、愚癡、邪見、五蓋、五欲，眾塵勞中，建立佛法，不起二心，得大功德。

譬如有人，持堅牢船，度於大海，不動身心，而到彼岸。善知識者，亦復如是。以大願船，處生死海，運載汝等，不動身心，到涅槃岸。

善男子！譬如有人欲行嶮路，恃託一人，善於伎藝，鎧仗備有，并好寶車，駕以五馬，身心無畏，得達無難。善知識者亦復如是。法身壯大，善於方便，六度伎藝，慈悲鎧仗，皆悉備有，乘於大乘，駕五神通，運載汝等得無所畏。離於三塗，生死諸難。

善男子！譬如有人，依楞伽寶，服甘露妙藥，消除諸病，命不中天。善知識

者亦復如是。依大智寶，服於法藥，消煩惱病，慧命無窮。

善男子！譬如有人，依師子王，行諸獸中，無有怖畏。善知識者亦復如是。若有依者，遊塵勞中，亦無所畏。

善男子，譬如有人，依須彌山，假使八風，不能吹動。依善知識亦復如是。八難之風，不能吹動。

善男子！譬如有人，依金翅鳥，遍觀大海，不畏諸災魔竭魚難。依善知識亦復如是。逕生死海，不畏諸魔外道之難。

善男子！善知識者，無量功德，欲廣說者，窮劫不盡。

⑩ 求善知識不惜內外壽命嫌疑品

若有智者，見善知識，應當供養，不惜身命。何況揣財眷屬妻兒及以國城如

得吝惜。若善知識，諸有所作種種境界，不應起於毛髮疑心。所以者何？若有疑心，不得正受甚深法句。汝等大眾，於善知識，應斷疑念。

⑪ 普光問如來慈偈答品

爾時，普光莊嚴菩薩白佛言：世尊！云何正受甚深法句？何謂甚深？

佛言：勿作是問。若今說者，聲聞、緣覺，及新發意菩薩，聞說斯法，心所迫迮，斷壞善根。

普光莊嚴菩薩白佛言：世尊！為我等輩，方便演示，與諸眾生，作將來業。

爾時，世尊以偈頌曰：

佛子善諦聽 我今如實說 一切諸法性 本來無所動

諸佛依貪瞋 如坐於道場 塵勞諸佛種 本來無所動

五蓋及五欲	為如來種性	常以是莊嚴	本來無所動
婬欲及邪見	并餘結使等	究竟解脫相	本來無所動
諸佛從本來	常處於三毒	長養於百法	而成於世尊
諸法從本來	無是亦無非	是非性寂滅	本來無所動
一切諸眾生	實無有生滅	生滅即涅槃	本來無所動
一切諸法相	從緣無起作	起作性相如	本來無所動
一切諸文字	無實無所依	俱同一寂滅	本來無所動
說諸布施福	於中三事空	究竟不可得	施福如野馬
若說諸持戒	無善無威儀	戒性如虛空	持者為迷倒
若見瞋恚者	以忍為羈鞅	知瞋等陽炎	忍亦無所忍

說諸精進業	為增上慢說	無增上慢者	無善無精進
若起精進心	是妄非精進	若能心不妄	精進無有虛
若學諸三昧	是動非坐禪	心隨境界流	云何名為定
參羅及萬像	一法之所印	云何一法中	如生種種見
一亦不為一	為欲破諸數	淺智之所聞	見一以為一
若有聞此法	常修寂滅行	知行亦寂滅	是則菩提道
若欲證此法	親近善知識	善學諸方便	度脫於群生
我今說此法	為攝有眾生	若無我見者	究竟無所說
此是金剛句	決了諸邪見	一切外道輩	盡力無能壞
若有諸眾生	得聞如是經	雖在三塗中	究竟清涼樂

若聞此經名 及解一句義 必生諸佛國 何況讀誦者

若有此經處 我恒在其中 為護如是人 令得無上道

爾時，世尊說此偈已。普光大眾，得無生法忍。

⑫ 即為寶明授記品

寶明菩薩尋得授記：汝當來世，過八十萬劫，當得作佛，號寶明，如來。應供。正遍知。明行足。善逝。世間解。無上士。調御丈夫。天人師。佛世尊。

時，有眾生純一大乘，更無聲聞、辟支佛名。國土嚴淨，過無量壽百千萬倍。

與諸菩薩授記已訖，便欲捨坐。

⑬ 傳持品

爾時，文殊師利菩薩前白佛言：世尊！此經，當來在何等人手，以何因緣，

得聞此經？

佛言：善男子！此經甚深，難可得聞。

譬如金剛，一切凡夫不能睹見，唯除帝釋。此經亦爾，聲聞緣覺所不能見，唯除菩薩。

譬如師子，一切禽獸，無敢向者，唯除龍王。此經亦爾，聲聞緣覺，斷絕希望，唯除菩薩。

假使有人，純以真金，滿四天下，以用布施。不如聞此經名，得福萬倍。

假使有人，純以七寶作諸床榻，以頗梨衣供養眾生，滿閻浮提界於一劫。不如聞此經名，得福萬倍。

若有善男子善女人，得聞此經者，當知是人，親侍無數諸佛，殖眾德本，乃

能得聞。

善男子！此經，當來至於八地菩薩之手。

⑭ 護經如眼寧喪身命不怠品

佛告諸大眾及寶明菩薩：汝護是經，如護眼目。寧喪身命，莫於此經，而生懈怠。若有眾生，於此經中生信心者，當知是人，真佛弟子，無有疑也。

爾時，世尊說此經已。

一切大眾，天龍八部，皆各歡喜，如法奉行。

佛說法句經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>